

APEC wajar kerjasama dengan blok ekonomi bukan tradisional

Hubungan dengan ASEAN, Kesatuan Afrika serta rangkaian digital rentas sempadan kukuh daya tahan

Lima, Peru: Negara anggota Kerjasama Ekonomi Asia Pasifik (APEC) wajar meneroka potensi kerjasama dengan blok ekonomi bukan tradisional seperti Kesatuan Afrika, Amerika Latin dan BRICS, kata Perdana Menteri, Datuk Seri Anwar Ibrahim.

Dalam ucapannya di Dialog Tidak Formal Pemimpin APEC bersama Tetamu sempena Minggu Pemimpin Ekonomi APEC di sini, Anwar menekankan kepentingan kerjasama dengan ASEAN, Kesatuan Afrika dan rangkaian digital rentas sempadan dalam memperkukuh daya tahan global.

"Walaupun dunia berdepan ketidaktentuan geopolitik, APEC dan BRICS perlu memanfaatkan kekuatan bersama untuk membentuk semula struktur kuasa ekonomi," katanya.

Anwar yang juga Menteri Ke-

wangan berkata, kerjasama APEC dan BRICS mampu mewujudkan visi pertumbuhan ekonomi inklusif yang memperkasa komuniti di seluruh benua.

"Setiap kanak-kanak yang tidak mempunyai akses kepada pembelajaran digital, setiap usahawan yang terhalang oleh masalah kewangan, dan setiap keluarga yang terancam oleh degradasi alam sekitar adalah peluang yang terlepas untuk pertumbuhan dan kestabilan," tegasnya.

Beliau turut mencadangkan inisiatif bersama APEC dengan Pakatan Pasifik untuk membangunkan pertanian pintar iklim dan kerjasama lebih erat dengan OECD bagi melancarkan program inklusi digital berpatutan.

"Kerjasama rentas wilayah ini membolehkan ekonomi APEC memanfaatkan sepenuhnya inovasi kolektif, memperkukuh sokongan kepada mereka yang paling memerlukan," katanya.

BRICS yang kini dianggotai Brazil, Russia, India, China, Afrika Selatan, Iran, Mesir, Habsyah dan Emiriah Arab Bersatu, mewakili kira-kira 40 peratus penduduk dunia dan menyumbang 26.2 peratus daripada KDNK global.

Malaysia baru-baru ini diiktiraf sebagai satu daripada 13 negara rakan kongsi BRICS, blok yang menyumbang satu perlima daripada perdagangan global.



Anwar pada Dialog Tidak Formal Pemimpin APEC bersama Tetamu sempena Minggu Pemimpin Ekonomi APEC di Lima, Peru, semalam.

(Foto BERNAMA)

Media sebelum ini turut melaporkan BRICS dengan KDNK terkumpul AS\$26.6 trilion, hampir menyamai kekuatan ekonomi Kumpulan Tujuh (G7) yang terdiri daripada Kanada, Perancis, Jerman, Itali, Jepun, United Kingdom, Amerika Syarikat dan Kesatuan Eropah.

Bina ekonomi inklusif

Anwar berkata, pemimpin APEC perlu menerajui kerjasama ekonomi global dengan lebih berani, menjadikan platform itu sebagai

piawai emas dalam tadbir urus global.

Perdana Menteri berkata, APEC perlu tampil di barisan hadapan untuk membina ekonomi yang inklusif, mapan dan adil.

"Dunia sedang memerhati, dan kita tidak mampu untuk berleengah. APEC mesti menjadi penanda aras dalam kerjasama ekonomi global.

"Dengan memastikan tadbir urus global yang baik, membina daya tahan dan melindungi golongan rentan serta tertindas, kita

dapat menawarkan hala tuju dunia yang bukan saja makmur tetapi juga mapan dan adil," katanya.

Hadir sama Menteri Luar Negeri, Datuk Seri Mohamad Hasan; Menteri Pelaburan, Perdagangan dan Industri Tengku Datuk Seri Zafrul Abdul Aziz; Timbalan Menteri Sumber Asli dan Kelestarian Alam, Datuk Seri Huang Tiong Sii; Timbalan Menteri Peralihan Tenaga Dan Transformasi Air, Akmal Nasrullah Mohd Nasir dan Pengerusi ISIS, Datuk Prof Dr Mohd Faiz Abdullah.